



客(四縣)/懷想/☆☆★★

一碗米，五碗水

「一碗米，五碗水」阿婆教倅煲粥。

五月節邊仔，長豆仔當有好摘。天時熱燻燻仔，電扇緊捩緊駁，頭那也跔等緊拂緊昂。遠遠近近个蟬仔，大嫲聲噉嘶，叫到日頭也蹦颯，一下就到晝了。燒風緊吹，汗緊流，懶尸停動哦！無就來煲豆粥好了，較簡單。

阿婆早就同豆仔擇好放在水槽，浸等水。該係打早个時節摘个。兩、三家濟，留著一搭仔當晝頭食。長(diong)著个全部愛燻來晒乾，正毋會放到冇忒。「一碗米，五碗水。幾多人在屋下？兩碗米罇無？怕罇。」佢量米、洗米、倒水，嚶嚶啾啾。豆仔愛先炒過，攞蒜頭焗香，燴軟燴鹹來。等加一下米煲滾了，正攞落去共下煮。毋好暢大火，會浮出來；毋好忒細火，會凝底結爛。無煮透，醒醒毋好食；煮忒綿，淨吞無噍，無搭碇。好了好了，火關忒，毋好攞了哦，頂項還一層米粥水，等佢作。毋好煮到燥水正關火，會作到硬硬，變「攸杓粥」，盡攸就攸毋攸。一碗米，五碗水，幾多碗、煮幾綿，這兜佢全部測到準準。

「一碗米，幾多碗水呀，阿婆？」噲！仰屋肚一哪都恬恬？半晝邊仔還同偲這群細鬼仔共下晒豆乾个啊！該難腳个禾埕，該嬈手个豆乾；搶等食豆仁个細姪仔，抽骸另命个蟬仔……忽然間，就像撇忒聲音个電視，彩色變烏白，做佢緊做。

這係電扇盡捩也吹毋會暢快个時節，毋當摻該燒嬈嬈个豆粥煞煞划落嘴，昇出一身大汗。一身大汗出忒，正有心神，好好來望等壁項，阿婆个該張相。

作者：徐汎平

☆詞彙學習☆

【噉嘶】ve` se`：嘶吼。

【醒醒】xiang` xiang`：稀飯仍然粒粒分明、不夠軟爛的樣子。

【蹦颯】bang` beu`：氣得跳腳。

【家濟】ga` ji：以蘭草編織的提袋。

【作】zog`：麵、飯等吸收水分。

【焗】biag：以油爆炒。

【攸杓粥】gog sog zug`：乾而稠，會黏附湯匙、不易脫落的稀飯。

【浮】pu`：水沸騰溢出。

【結爛】gied` lad`：東西燒焦黏於鍋底。

【一哪】id` nai：到處。

☆文法學習☆

【盡 + V_{動詞}】再怎麼……。表示動作持續或重複進行，到達最極致的狀態。

例 1：茶桶个茶無了，盡泮乜正伸一杯。（茶桶裡的茶沒有了，再怎麼倒也只剩一杯。）

例 2：作業恁多，盡寫乜寫毋忒，仰結煞？（作業這麼多，再怎麼寫也寫不完，怎麼辦？）